

**Pisortat illuutaat A/S Ini-miit aqunneqartut suli imermut attaveqanngitsut tamarmik attavilersorneqarnissaasa pilersaarusiornissaa siunertaralugu Naalakkersuisut suliassamik piareersaasioqqullugit peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Doris Jakobsen, Siumut)

### **Akissuteqaat**

(Avatangiisinut Pinngortitamullu Naalakkersuisoq)

### **Aappassaanneerneqarnera**

Naalakkersuisut sinnerlugit Sanaartornermut Ataatsimiititaliaq imm. 129-mut isumaliutissiisummik pitsaasumik peqqissaartumillu suliaqarsimaneranut qutsavigerusuppara.

Naalakkersuisut immikkoortup suillermeerneqarneranut allannguutissatut siunnersuummik imatut imaqartumik saqqummiussaqrput:

*”Pisortat illuutaat A/S Ini-miit aqunneqartut suli imermut attaveqanngitsut tamarmik attavilersorneqarsinnaanissaasa pilersaarusiornissaa siunertaralugu Naalakkersuisut annertussusissamik aningaasartuutissanillu misissuinissamut peqquneqarnissaannik Inatsisartut aalajangiiffigisassaattut siunnersuut.”*

Nuannaarutigalugu maluginiarpara, ataatsimiititaliap isumaqatigiittup Naalakkersuisut allannguutissatut siunnersuutaat tapersersoraat.

Matuma kinguliani ataatsimiititaliap isumaliutissiisutaa siunnersuutaalu naatsunik oqaaseqarfigissavakka.

Allannguutissatut siunnersuummi iliuusissatut pilersaarut sunik imaqartariaqarneris, iliuusissatut pilersaarutit suliarineqarnera qanoq aqqissuunneqarsinnaanersaq kiisalu iliuusissatut pilersaarusiornissaq qanoq akeqartussaannersaq pillugu misissuinissamut Naalakkersuisut peqquneqassasut ataatsimiititaliap isummerneranut Naalakkersuisut isumaqataapput.

Maluginiarpara, tamatuma peqatigisaanik inissiat siunnersuummut ilaatinneqartut pitsaassusiinik – suliassamut matuma qulaani taaneqartumik atatillugu – misissuisoqarnissaa Sanaartornermut Ataatsimiititaliap kissaatigigaa. Aamma kommunit erngup errortuivikup ajornartorsiutaaneranut tunngatillugu, aammalu najukkani inissiatit pillugit ilisimasaannik ilaatitsinissaq siunnerfigalugu sapinngisamik siusissukkut suleqataatinneqarnissaat Ataatsimiititaliap inassutigaa.

Qulequttat taakkua suliassaqarfimmi pilersaarutitut attuumassuteqangaatsiarsinnaallutik pingaaruteqarmata, Naalakkersuisut tungaannit tapersiinnarsinnaavarput. Taamaattumik eqqarsaatigisassat pineqartut piareersaataasumik sulinermit aammalu iliuusissatut pilersaarusiaasannaasup suliarineqarnissaanut atatillugu ilanngunneqarnissaat pingaaruteqarpoq.

Tamatuma saniatigut Ataatsimiititaliamit erseqqissaatigineqarpoq, siunnersuut manna Kalaallit Nunaanni inuunermi najugaqarfeqarnermilu atugassarititaasunik pitsaanerusunik pilersitsiniarluni suliniuteqarnermi tamarmiusumi sakkussatut ilaasariaqartoq.

Tamatumani siunnerfiusut, aammalu suliassaqarfiup tamatuma ineqarnermut suliassaqarfimmi pingaarnersuilluni tullerriaarinermit suliniuteqarnermullu tamarmiusumut ilaasariaqarnera Naalackersuisunit isumaqatigilluinnarparput.

Taamatut oqaaseqarlunga Inatsisartuni immikkoortoq pillugu oqallilluarnissarput neriuutigaara.